

## DOMENIE XXI «VIE PAL AN»

### Antifone di jentrade cf. Sal 85,1-3

**S**lungje la tô orele, Signôr, e rispuindimi:  
gno Diu, salve il to famei che in te al spere;  
ve dûl di me, Signôr,  
ch'o ai berlât viers di te dute la zornade.

### Colete

Diu, che tu unissis tun sôl volê i cûrs dai tiei fedêi,  
daur ai tiei popui di volê ben a ce che tu comandis  
e di bramâ ce che tu desideris  
par che, framieç dai savoltaments di chest mont,  
i nestrîs cûrs a sedin pontâts là ch'e je la vere gjonde.  
Pal nestri Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE Is 66,18-21

**A tornaran a menâ dongje ducj i vuestris fradis di ducj i forescj.**

Dal libri dal profete Isaie

Cussì al dîs il Signôr: «O vignarai a tirâ dongje ducj i forescj e dutis lis lenghis; lôr a vignaran e a viodaran la mê glorie. Ur darai un segnâl e o mandarai cualchidun dai lôr, ch'a son restâts, de bande dai forescj, de bande des isulis lontanis che no an sintût a fevelâ de mê innomine e che no an viodude la mê glorie; lôr a contaran la mê glorie framieç dai forescj. A tornaran a menâ dongje ducj i vuestris fradis di ducj i forescj come ufierte al Signôr sun cjavai, sun cjars, sun puartantinis, sui mui e sui dromedaris, te mê sante mont di Gjerusalem, al dîs il Signôr, come che i fîs di Israel a puartin l'ufierte in vâs monts tal templi dal Signôr. Ancje framieç di lôr mi cjolarai predis e levits». Peraule di Diu.

### SALM RESPONSORIÂL dal Salm 116

**R.** Ti adaran, Signôr, ducj i popui de tiere.

Laudait il Signôr, ducj vualtris popui,  
ducj vualtris, forescj, cjantait la sô glorie. **R.**

Al è stât grant par nô il so boncûr  
e la fedeltât dal Signôr e dure par simpri. **R.**

### SECONDE LETURE Eb 12,5-7.11-13

**Il Signôr al corêç chel che i sta a cûr.**

De letare ai Ebreos

Fradis, o vês za dismenteade la raccomandazion che us è stade fate tant che a fîs: fî gno, no sta spreseâ la corezion dal Signôr e no sta butâti jù cuant che lui ti corêç; parcè che il Signôr al corêç chel che i sta a cûr e al cjastie chel che lu ten in cont di fî.

Al è pe vuestre corezion ch'o patîs! Diu us trate come fîs; e cuâl esal chel fî che il pari no i fâs une corezion? Sigûr che ogni corezion, sul at, no nus da ligrie ma displasê; dopo però e bute pâs e justizie a di chei ch'e à indreçâts.

Pa la cuâl, tirait sù lis vuestris mans ch'a pendolin e i zenôi clopadiçs e dreçait i trois stuarts pai vuestris pas, par che il pît clopadiç nol vedi di strupiâsi, ma anzit di comedâsi.

Peraule di Diu.

### CJANT AL VANZELI cf. Lc 13,29

R. Aleluia, aleluia.

Ducj i popui, di soreli jevât a soreli a mont,  
a cjapan part tal gustâ dal ream di Diu.

R. Aleluia.

### VANZELI Lc 13,22-30

A vignaran di soreli jevât e de tramontane e ducj a varan part tal gustâ dal ream di Diu.

Dal vanzeli seont Luche

In chê volte, Gjesù al passave par citâts e par borcs insegnant e intant al leve viers di Gjerusalem. Un i domandà: «Signôr, sono pôcs chei che si salvin?». I rispuindè: «Metêtle dute par jentrâ pe puarte strete, parcè che us garantîs che une vore di lôr a ciraran di jentrâ ma no rivaran. Dopo che il paron di cjase al sarâ jevât sù e al varâ inclostrade la puarte, vualtris o scomençarês a restâ difûr e a tucâ te puarte disint: Signôr, vierzinus. Ma lui us rispuindarà: No us cognòs; no sai di dulà ch'o vignîs. Alore o scomençarês a dî: O vin mangjât e bevût denant di te, e tu tu sês passât insegnant pai nestris borcs. Tal ultin lui us disarà: Jo no sai di dulà ch'o sês. Slontanaitsi di me, ducj vualtris ch'o fasês dome mâl! Li o ciularês e o patissarês un grum cuant che o viodarês Abram, Isac e Jacop e ducj i profetis tal ream di Diu, e vualtris difûr. A vignaran di soreli jevât e di soreli a mont, de tramontane e dal misdî e ducj a varan part tal gustâ dal ream di Diu. E ve che un pôcs di chei che cumò a son fra i ultins a saran i prins, biel che altris di lôr che cumò a son i prins a saran i ultins». Peraule dal Signôr.

### Su lis ufiertis

Signôr, che cuntune sole vitime,  
ufierte une volte sole,  
tu ti sês cuistât un popul di fîs,  
danus, inte tô Glesie, la gracie de unitât e de pâs.  
Par Crist nestri Signôr.

### Antifone a la comunion cf. Sal 103,13-15

Cul prodot des tôs voris tu passis la tiere, Signôr,  
par tirâ fûr il pan de tiere e il vin ch'al indalegri il cûr dal om.

### Daspò de comunion

La midisine dal to boncûr, Signôr,  
ch'e operi adimplen dentri di nô  
e judinus e refinissinus  
in mût di fâti content in ogni nestre vore.  
Par Crist nestri Signôr.